

## **BUNDEL B: WOESTYNTOG VERHALE (EKS, NUM, DEUT)**

# Inhoudsopgawe

Inhoudsopgawe .....	2
Uittog uit Egipte (Eks 1-15).....	3
Moses word opgelei om die volk te bevry .....	3
Die tiende plaag .....	8
Hoogverhewe is die Heer!.....	9
Uittog .....	11
‘n Jaar by Sinai (Eks 15-24).....	12
Bewaar in die swaar .....	12
Kos en water .....	13
Delegeer en prioritiseer .....	14
Die verbond by Sinai .....	15
Verbondsvoorwaardes.....	16
Ons wil U kan sien!.....	17
Agt en dertig jaar deur die woestyn (Numeri) .....	18
Opstand of God se hand?.....	18
Jy gaan dit berou as jy nie vertrou .....	19
Die drumpelwagter .....	21
Kyk op in geloof .....	23
Bileam .....	24
Op die rand van die beloofde land (Deuteronomium).....	26
God is getrou: Jy moet vertrou .....	26
Versoekings in die woestyn.....	27
Seën en straf .....	29
Ek wil soos ‘n koning leef .....	31

## **Uittog uit Egipte (Eks 1-15).**

### **Moses word opgelei om die volk te bevry**

Vir vierhonderd en dertig jaar  
het die volk vermeerder daar. (Eks 1:7, 20)  
So vul hul feitlik Egipteland,  
so baie soos die see se sand! (Gen 12:2, Gen 32:12)

Farao het vir hulle begin skrik  
en hulle as slawe onderdruk. (Eks 1:11)  
Toe dit steeds blyk dat hy die stryd verloor,  
gee hy opdrag om die seuntjies te vermoor. (Eks 1:22)

God het reeds anders bepaal,  
en Moses is uit die mandjie gehaal.  
Hy is in die koning se paleis opgelei (Eks 2:1-10)  
onwetend dat hy eendag die volk sou lei...

Vir veertig jaar in die woestyn,  
moes hy oorlewingskuns verfyn. (Eks 2:21)  
God was besig om hom voor te berei  
om 'n hele volk deur die woestyn te lei.

Moses het Christus groter rykdom geag  
as die kortstondige paleis en gelag.  
Hy het veertig jaar volhard en God gedien  
soos iemand wat die Onsienlike sien. (Heb 11:24-27)

God is ook besig om jou voor te berei,  
maar probeer jy Christus of eie rykdom kry?  
Wonder jy ook hoekom is jy in die woestyn?  
Jy moet volhardend opkyk in jou pyn.

Intussen het die volk gekerm en gekla  
en tot God gebid en verlossing gevra.  
God het gehoor hoe die gebede klink  
en aan sy verbond met Abraham gedink. (Eks 2:24-25)

God het die nood van die volk gesien,  
ja, swaarkry wat hulle nie verdien...  
Hy het dit ter harte geneem:  
Tyd om hulle na Kanaän terug te neem! (Eks 3:8)

In jou sondeslawerny:  
Bid tot God – Hy bevry!  
Hy bly altyd hoor en sien

en gee 'n land wat jy nie verdien!

Die bos brand

Daar op die berg se rand  
het die bos bly brand...

“Trek uit jou skoene – dis gewyde grond!  
Ek is wat Ek is – die God van die verbond. (Ek 3:5-6)  
Ek het gehoor en gesien hoe my volk ly,  
daarom het Ek afgekrom om hulle te bevry.” (Eks 3:7-8)

“O God, ek het ‘n vraag:  
Wie is ék dat ek dit by Faraó kan waag?”  
“Wees nie bevrees:  
Ek sal by jou wees.” (Eks 3:11-12)

“Die volk gaan my vra  
Wat is die Naam wat U dra?”  
“Ek is wat Ek is:  
die Verbondsgod – gewis! (Eks 3:14-15)

Gaan sê: Die Here het aan my verskyn.  
Hy hoor en sien julle pyn.  
Hy gaan julle hier kom haal  
na die land wat die belofte bepaal. (Ek 3:17)

Die koning gaan julle nie wil laat gaan,  
maar deur God se wonders sal hy verstaan.  
As God julle in die woestyn vergaar,  
bring vir Hom ‘n dankoffer daar.” (Eks 3:19-20)

Oppad wou die Here Moses doodmaak,  
maar sy vrou het hom met bloed aangeraak.  
Daarna het sy uitgeroep: Bloedbruidegom!  
Deur bloed sal daar vir jou ook beskerming kom: (Eks 4:23-24, 1983 en 1953)

God het vooraf bestem om jou te besprinkel met bloed: (I Pet 1:2)  
Jesus het jou gereinig want Hy het vir jou sonde geboet. (I Joh 1:7)  
Daardeur het jy nou vrye toegang tot die heiligdom! (Heb 10:19)  
Gaan nou, soos Moses, en vertel Sy volk van Hom!

Daar op die berg se rand  
is die bos aan die brand...  
God het jou reeds opgelei -  
Is jy besig om Sy roeping te vermy?

Die nege plae  
Ek sal die Farao in opstand laat kom,  
sodat ek My mag kan wys deur hom. (Rom 9:17)

Farao, deur wat nou gaan gebeur,  
sal jy weet wie is die Heer.  
As ek met die kerie gaan slaan,  
sal die Nyl se water uit bloed bestaan. (Eks 7:17)

Farao het hom verset  
en die volk se trek belet. (Ek 7:32)

God het met paddas Sy mag gewys:  
Dit het gewemel tot in die paleis! (Eks 8:1-6)  
Bid tot jou God om die plaag af te weer.  
U weet daar is geen God soos die Heer! (Eks 8:8-10)

Al het die Farao verstaan,  
het hy nie die volk laat gaan. (Eks 8:15)

So baie soos die stof en sand,  
was die muggies in die land.  
Die towenaars het daarvoor verklaar:  
Ons het die vinger van God gewaar! (Eks 8:17-19)

Farao het steeds koppig gebly  
"Julle kan nie gaan nie!", sê hy.

Egipte is lam gelê deur die steekvliegswerm,  
maar God het Israel daarteen beskerm. (Eks 8:20-24)  
Ek kan nie langer hierteen stry:  
Gaan offer en bid vir my! (Eks 8:28)

Tog het die Farao ook hierdie keer  
hom nie tot God bekeer... (Eks 8:12)

Perde, kamele, beeste en kleinvee is geraak:  
Die pes het hulle almal doodgemaak!  
Die mense het aan Farao vertel:  
Geen dier is dood van Israel! (Eks 9:2-7)

Farao het steeds onversetlik gebly  
en die volk van God nie bevry. (Eks 9:7)

Moses het roet van 'n oond opgegooi  
en so swere oor Egipte verstrooi.  
Die etter het aanhoudend uitgekom

en selfs die towenaars was verstom. (Eks 9:10-11)

Al kon Farao nie oor God se almag stry,  
het die Here hom koppig laat bly. (Eks 9:11)

Ek het jou My mag gewys,  
dat die wêreld My kan prys! (Eks 9:16)  
Die hael en blitse het alles platgeslaan:  
Niks wat buite was het bly staan. (Eks 9:25)

Weer kan mens die koppigheid nie verstaan,  
want Farao het steeds die volk nie laat gaan.

Julle moet julle kinders van die wonders leer,  
dat hulle kan besef: Ek is die Heer! (Eks 10:2)  
Die sprinkane het elke groen sprietjie geëet  
Vergewe my: Julle God is Here, ek weet! (Eks 10:17)

Maar die Here het nog 'n keer  
die Farao die trek laat keer. (Eks 10:20)

Vir drie dae was dit donker gewees.  
Niemand kon iets sien of lees.  
Maar daar waar die Israeliete bly,  
het hulle steeds die lig gekry!  
(Eks 10:22-23)

Vir die negende keer  
wou Farao nie leer... (Eks 10:27)

Hierdie verhaal vra vir jou vrae:  
Is God in jou lewe al by nege plae?  
Het jy al iets uit Sy wonders geleer?  
Besef jy al Hy is die enigste Heer?

Of gaan jou nog 'n keer  
jou nie tot Hom bekeer?

Wil jy net nie weet?  
Of het jy dalk vergeet?  
Smeer Sy bloed aan jou kosyn,  
anders deel jy in dood en pyn!

As God dan die laaste plae bring  
sal jy ook die lied van die Lam kan sing:  
Groot en wonderlik is U werke  
Here God, U almag het geen perke! (Op 15:3, 1953)

## Die tiende plaag

Elke eersgeborene sal sterf!  
Die slafin sal oor haar kind weën.  
'n Gehuil op elke Egiptiese werf.  
Selfs die koning sal treur oor sy seun... (Eks 11:4-7)

Smeer bloed van die lam aan die kosyn.  
Eet die vleis en ongesuurde brood.  
Waar Ek bloed sien, kom geen pyn,  
maar anders maak Ek die oudste dood! (Eks 12:7-13)

As herinnering moet julle Paasfees vier.  
As julle kinders dit wil verstaan,  
vertel hul: God het die dood gestuur,  
maar ons eersteling oorgeslaan! (Eks 11:24-27)

Om middernag het dit gebeur:  
Die eerste is dood al was hy oud of jonk!  
Selfs diere is geraak daardeur.  
Ja, tot die gevangenis in die tronk... (Eks 12:29-30)

Vat jul goed en trek in die woestyn.  
God se wonders moes ek verstaan...  
Nou is my eie seun is dood – die pyn!  
Bid dat dit met my ook goed mag gaan. (Eks 12:31-32)

Elke eersteling moet jy aan My wy,  
en so ook elke eerste manlike dier,  
want in Egipte het Ek hom bevry.  
Seuns kan jy loskoop met 'n offerdier. (Eks 12:12-15)

Smeer Jesus se bloed aan jou kosyn,  
dan gaan die dood by jou verby.  
Drink tot Sy gedagtenis die wyn,  
want deur Hom het jy verlossing gekry! (I Kor 11:25)

Die brood is teken van Sy liggaam.  
Soos ongesuurde brood is jy vergeef.  
Neem die brood en eet dit saam,  
dat jy ewig by Hom kan leef! (I Kor 11:23)

Prys God, die almagtige Heer.  
Wees bly en juig, gee Hom eer:  
Hy het jou met fyn klere getooi  
en na die bruilofsmaal van die Lam genooi! (Op 19:6-9)



## Hoogverhewe is die Heer!

Ek maak Farao koppig vir 'n laaste keer,  
dan sal Egipte besef: "Ek is die Heer!" (Eks 14:4)

Die Egiptenare storm met strydwaens in gelid  
Die volk het bang geword en tot God gebid. (Eks 14:10)

Bly kalm. Waarvoor is julle so bang?  
God sal vir jul nood laat oorgaan in sang. (Eks 14:13-14)

Die Israeliete het op droë grond deur die see gegaan  
Die water het soos 'n muur langs hulle gestaan! (Eks 14:21-22)

God het die Egiptenare verwar en en hul wiele het afgekom  
Die see het oor hulle gestroom – elke mond het verstom! (Eks 14:24-28)

Die volk is met ontsag vir God gevul  
Hulle kon glo dat God beloftes vervul! (Eks 14:33)

Hulle sing toe 'n lied tot God se eer:  
Hoogverhewe is die Heer!

Dit was God se vinger:  
Perd en strydwa is in die see geslinger! (Eks 15:1)

U, o Here is my krag.  
U beskerm my in die nag.  
Die Here oorwin die stryd.  
Sy naam is "Here", vir altyd! (Eks 15:2-3)

Dit was God se vinger:  
Perd en strydwa is in die see geslinger! (Eks 15:4)

U regterhand is gedug in krag.  
Hoog verhewe is U mag. (Eks 15:6)  
U red ons uit die dood.  
Die vyand sink soos lood. (Eks 15:8-10)

Dit was God se vinger:  
Perd en strydwa is in die see geslinger! (Eks 15:19)

U lei U volk met U hand  
na U gewyde land. (Eks 15:13)  
Wie is soos U, o Heer,  
wat tot in ewigheid regeer? (Ek 15:11,18)

Dit was God se vinger:  
Perd en strydwa is in die see geslinger! (Eks 15:21)

Kyk net wat in die Nuwe Testament staan:  
Christus het deur die see met hulle gegaan.  
Vanuit die wolk is hulle gedoop  
tewyl hulle deur die see kon loop. (I Kor 10:1-5)

As die vyand agter jou rug  
jou teen die see inwig,  
vra God van jou 'n geloofstree  
in die wete Hy sal die uitkoms gee. (Heb 11:28-29, Ps 106:12)

Sien dan God se magtige vinger  
as hy probleem die see in slinger.  
Sing dan 'n lied tot God se eer:  
Hoogverhewe is my Heer!

## Uittog

Sing liedere, sing tot Sy eer.  
Dink aan die magtige dae van die Heer.  
Leer van die wonders uit Sy hand:  
Hy hou Sy verbond altyd in stand. (Ps 105:1-8)

God het sy volk in Egipte vergaar,  
maar as slawe is hul verdruk toe daar.  
Water in bloed en visse het gevrek  
maar Farao wou hul nie laat trek. (Ps 105:24-29)

Plaag na plaag het die land geslaan  
"Ek is die enigste God" moet jul verstaan.  
Dood van eersgeborenes laat ouers in pyn,  
maar net vir dié sonder bloed aan die kosyn...

Drink uit hierdie beker wyn  
dis soos die bloed aan die kosyn.  
Ek haal jou uit die sondeslawerny -  
eet die brood en dink so aan My. (Luk 22:19-20)

Al het die volk getwyfel, het God sy volk nie beskaam:  
Hy het hulle gered ter wille van die eer van sy Naam.  
God het hulle droogvoets deur die Rooisee gebring:  
Die volk het sy beloftes geglo en sy lof besing. (Ps 106:7-12)

Hierdie gebeure laat jou vandag nog verstaan  
dat God met jou deur vuur en water gaan. (Ps 66:5-6, 10-12)  
Voor die ontsagwekkende God moet jy buig  
tot eer van Sy Naam moet jy juig. (Ps 66:1-4)

## **‘n Jaar by Sinaï (Eks 15-24).**

### **Bewaar in die swaar**

Die Here het hul beskut met ‘n wolk in die dag  
en lig gegee met vuur in die nag.  
Met brood uit die hemel is hul versadig  
en met water uit ‘n rots begenadig. (Ps 105:39-41)

Deur die woestyn kon hulle op Hom vertrou  
want Hy het sy beloftes gehou.  
Geen volk kon die inname keer,  
doen daarom Sy wil en prys die Heer. (Ps 105:44-45)

In jou woestyntog moet jy ook onthou:  
God is aan sy beloftes getrou.  
Hy sal jou vat na die beloofde land:  
Hou uit dankbaarheid sy gebooie in stand!

## Kos en water

Deur die barre woestyn trek die volk  
onder die beskerming van die wolk.  
Die pad is hard, warm en swaar.  
Hul kos en water was gou al klaar.

In Egipte was daar vleispotte en koring gerf -  
nou gaan ons van honger in die woestyn sterf! (Eks 16:2-3)  
Môre sal julle die heerlijkheid van die Here sien  
met kos uit die hemel wat julle nie verdien. (Eks 16:7, 1953)

Die aand het kwartels in die kamp kom sit  
en die oggend manna, soos die ryp se wit. (Eks 16:13-14)  
Elke dag kon hulle net genoeg vir 'n dag vergaar,  
maar op die sesde dag moes hulle dubbeld opgaan. (Eks 16:4-5)

Toe die volk dors word, verwyd hul hom:  
Waarom moet ons van dors omkom? (Ek 17:3)  
Elke droë mond het hier verstom:  
God het water uit 'n rots laat kom! (Eks 17:6)

As ek so deur die woestyntog swoeg,  
voel ek so honger, dors en moeg...  
In sulke tye wil my eie begeertes my dryf  
Dis hoekom U die verhaal vir my ook skryf! (I Kor 10:1-6)

U is die Brood wat lewe gee,  
voed U my elke dag daarmee. (Joh 6:35,51)  
Ek vra dat U die Heilige Gees sal skink  
dat ek die lewende water kan drink. (Joh 7:37-39)

Jesus sê vir jou: Ek wil hê jy moet weet,  
wie My bloed drink en My liggaam eet  
sal op die laaste dag opstaan  
en vir ewig na die My toe gaan! (Joh 6:53-54)

## **Delegeer en prioritiseer**

Jetro het gou opgemerk  
dat Moses hom dood werk.  
Jy moet leer om te delegeer  
en jou dinge te prioritiseer.

Kry vir jou 'n struktuur  
om kleiner sake te bestuur.  
Jy kan hulle dan leer wat is God se wil  
in plaas dat kleiner dinge jou dag vul!

Wat is dit wat jou keer  
om God se sake te prioritiseer?  
Dis die dinge wat jy moet delegeer  
sodat jy kan fokus op jou Heer!

## Die verbond by Sinai

Gaan die wonders van die verlede na:  
Op arendsvlerke het Ek jou gedra!  
Die hele aarde behoort aan My  
so het ek julle ook as volk gekry (Eks 19:4-5).

As julle My verbondsvoorwaardes lees  
en in gehoorsaamheid My verbond hou  
en in alle omstandighede op My vertrou,  
dan sal Ek julle Koning en God wees! (Eks 19:6).

Voor Ek na julle kom is dit gepas:  
Julle moet julle reinig en klere was.  
Moenie eers aan my berg raak  
anders word jul doodgemaak! (Eks 19:10-12).

God se verskyning was 'n gesig  
met donderslae, vuur en weerlig.  
Die volk het nederig gebewe  
want die Verbondsgod lewe! (Eks 19:16-19).

Heilig, heilig is die leërskaars se matige Heer:  
Die hele aarde is vol van sy heerlikheid en eer! (Jes 6:3, 1983 en 1953)  
Die gans andere - daar is niemand soos Hy!  
En tog maak Hy bemoeienis met my:

Met bloed het U die verbond beseël,  
nou kan ek ook daarin kan deel! (Mat 26:28).  
Uit dankbaarheid wil ek U wette hou  
en met vreugde net op U vertrou.

## **Verbondsvoorwaardes**

Ek is die Here jou God.  
Ek het jou uit Egipte gelei  
en so van jou slaweband bevry.  
Hier is dan nou my gebod: (Eks 20:2)

Die samevatting van die wet  
is dat jy liefde vir God het  
en dat jou hele bestaan  
oor liefde tot jou naaste gaan. (Mat 22:37-40)

Omdat jy uit genade deel in dié verbond het,  
lewe dan volgens die bepalings van die wet,  
sodat jy eerbied betoon aan jou Heer.  
Aan God se naam kom toe alle eer! (Deut 28:58)

Die wet het gehoorsaamheid gevra,  
maar jy was nie daaraan getrou,  
daarom oordeel God jou nou.  
Die straf vir jou sonde moet jy dra! (Rom 3:19-20, Gal 2:16)

Vergewe my God, het jy gevra?  
Christus het die straf vir jou gedra!  
Hy het jou uit die slaweband bevry.  
Van al die skuld is jy nou vry! (Rom 8:2-3, Rom 10:4)?

Ja, deur hierdie wet  
kan jy jouself nie red.  
God het jou in Sy liefde omvou  
nou wil jy dit uit dankbaarheid hou. (Deut 6:4-5)



## **Ons wil U kan sien!**

Die volk: Ons wil U kan sien!

Na veertig dae het die volk gesug  
Aäron, Moses kom dalk nie terug!  
Ons moet ons God kan sien  
om Hom te eer en dien. (Eks 32:1)

Al het God dit in die wet verbied,  
het die volk vir hulle 'n kalf gegiet.  
Laat dit 'n afbeelding van ons God wees,  
more vier ons vir die Here fees! (Eks 32:5)

Moses, gaan kyk wat het die volk gedoen:  
'n Mens kan dit nie met My wet versoen!  
Hulle is opstandig daarom is Ek kwaad  
en gaan hulle vernietig oor hierdie daad... (Eks 32:9-10)

Dink aan die beloftes aan U dienaar  
en laat tog genadiglik U toorn bedaar.  
Daarna het God wel afgesien  
van die ramp wat hulle verdien. (Eks 32:13-14)

Moses: Ek wil U kan sien!

Laat ek tog U magtige verskyning sien!  
Ek sal vergewe wie ek wil vergewe,  
geen mens kan my sien en bly lewe.  
In die verbygaan kan jy my van agter sien. (Eks 33:18-23)

O God, ons kan nie trek sonder U. (Eks 33:15, 34:8)  
Ek is barmhartig, genadig, vol liefde en trou,  
maar Ek straf die sonde as jy my wette nie hou! (Eks 34:6)  
God het die verbond toe weer hernu. (Eks 34:10)

Moses kom toe van die berg af terug:  
Van God se heerlijkheid blink sy gesig.  
Vir Moses se gesig wat skyn was die volk bang  
en daarom het hy 'n doek daarom gehang. (Eks 34:29-35)

As die bediening van die wet so kon wees,  
hoeveel te meer die bediening van die Gees! (II Kor 3:7-8)  
Eers as jy weergebore word sal die sluier lig  
dan sien jy God se heerlijkheid met 'n onbedekte gesig. (II Kor 3:15-18)

Laat ek U só sien!

## **Agt en dertig jaar deur die woestyn (Numeri).**

### **Opstand of God se hand?**

My verbonsluiting met julle is nou verby,  
begin die trek om die beloofde land te kry.

Die Here sal julle seën  
en aan julle beskerming verleen.  
Hy sal tot julle redding verskyn  
en julle genadig wees in pyn.  
Die Here sal julle gebede verhoor  
en julle sal nie Sy vrede verloor. (Num 6:24-27).

Die wolk kolom het op die tabernakel gerus,  
snags daaroor 'n vuur wat jy nie kan blus. (Num 9:15-17).

Die volk het opstandig geword en onderling baklei,  
toe hulle 'n onweerstaanbare lus vir vleis begin kry.  
Sesonderd duisend mense! Wat ek by U wil weet:  
Waar gaan ek vleis kry dat hierdie massas kan eet?  
Ons het nie genoeg skape beeste of vee,  
daar is nie eers genoeg visse in die see! (Num 11:21-22)

Dink jy nie ek het die mag?  
Julle kan 'n maand se vleis verwag! (Num 11:19-23)

Die Here het met 'n wind gestuur  
'n swerm kwartels soos 'n muur!  
Hy het dit 'n meter diep om die kamp laat val,  
vir 'n dagreis ver – miljoene in getal!  
Hulle het opgetel en gulsig begin eet,  
maar God se hand hierin vergeet. (Num 11:31-32)

Toe ontvlam die toorn van die Heer  
en hulle kon die sterftes nie keer. (Num 11:33)

Ook vir jou beloof die Here sy seën,  
aan jou sal Hy beskerming verleen.  
Dink mooi voor jy weer opstandig raak  
oor elke onbenullige aardse saak...  
Jy kan regtig God se redding verwag,  
of dink jy dalk Hy het nie die mag?

Jou keuse: Kom jy teen My in opstand  
of gaan jy glo in die mag van My hand?

## **Jy gaan dit berou as jy nie vertrou**

God het alles in ses dae gemaak  
en op die sewende dag gerus. (Gen 2:2)  
En toe Adam die eerste keer ontwaak,  
het sy lewe begin met 'n rus!

Adam het hom nie aan die opdrag gesteur  
en so is die rus vir ewig versteur...

Uit Egipte se slawerny  
het God sy volk uitgelei.  
In die woestyn van sy wonders bewus, (Heb 3:11)  
was hulle oppad na 'n land van rus. (Deut 12:10)

Die Israeliete kon die rus nie binnegaan.  
Die boodskap om hier te verstaan:  
Hulle het God se almag nie vertrou (Heb 3:18, Ps 95, Num 14:11)  
en moes dit vir veertig jaar berou!

In die woestyn moes hulle weer  
van vooraf rus se lesse leer:

Die tien gebooi se sabbatswet (Ex 20, Deut 5)  
het werk op die rusdag belet.  
Prakties was hierdie les  
dubbeld die manna op dag ses.

Elke sewe jaar moes die lande rus  
en die volk van hul afhanklikheid bewus. (Lev 25:21-24)  
Die sesde jaar se oes so groot,  
dat daar genoeg was vir jaar sewe se brood.

Na veertig jaar was die straf verby  
en Josua het die volk in rus ingelei. (Heb 4:8, Jos 14:15 Jos 11:23 21:44)

Van al ons sonde so bewus,  
het Hy by ons in 'n krip kom rus.

Die boodskap wat in jou kop moet draai:  
Kom na my toe jy wat uitgeput is en oorlaai!  
Ek sal jou rus gee dat jy kan begeer,  
my sagte juk en om van My te leer!  
Jy sal rus kry vir jou gemoed,  
want ek sal vir jou sondes boet! (Mat 11:25-29).

Op die Sabbat is hy gekruisig vir elke daad.

My God, my God, waarom het U my verlaat?  
Ek kry hier geen rus, (Ps 22:2,3)  
Ek word met asyn gesus!

Jesus het so vooruit gegaan  
en op die eerste dag opgestaan.  
Hy het daarna opgevaar  
en werk aan ons rusplek daar.

Bedags nie 'n lig soos die son.  
Snags die maan nie 'n bron.  
Jou son en maan is die Heer,  
'n ewige rus om Hom te eer! (Jes 60:19-20 en Op 21:23)

... maar as jy nie op Sy almag vertrou,  
gaan jy dit vir ewig berou!

## Die drumpelwagter

Here, ek smag om in te gaan,  
maar ek moet op die drumpel staan. (Ps 84:11)  
Hoe lief het ek U woning Heer,  
met alles wat ek het, wil ek U eer! (Ps 84:2-3)

Selfs die mossies het 'n nes by U altaar.  
Tot die swaeltjie bring haar kind  
om rus en vrede in U huis te vind.  
Ai, hoe wens ek ek was ook daar. (Ps 84:4)

As Koragiet is ek 'n drumpelwagter – (I Kron 9:19)  
daar is hartseer geskiedenis daaragter:  
My voorgeslagte het 'n opstand gelei  
om die hoëpriester rol vir hul te kry. (Num 16:1-3, 9)

God self het hierdie saak geskik  
en Korag is deur die aarde ingesluk. (Num 16:32)  
Die ander opstandiges is met vuur verteer (Num 16:35)  
Dis duidelik – U is die Heer!

Met kieries is 'n teken van God gevra.  
Aäron sin het bloeisels en ryp amandels gedra! (Num 17:8)  
Die kerie is nou nog in die ark wat hier binne staan  
om opstandiges te herinner en vermaan. (Num 17:10)

Ek was in trane, dag en nag.  
Ek het so getwyfel in die nag. (Ps 42:6,12)  
Soos 'n wildsbok wat na water smag  
was my dors na die lewende God se krag! (Ps 42:2-3)

Toe ek deur die dorre laagtes trek  
gaan fonteine oop om my te versterk.  
Keer op keer ontvang ek nuwe krag  
en vroeë reëns se seënende mag. (Ps 84:7-8)

Nou gaan dit goed met U kind,  
want ek het my krag in U gevind.  
Noudat ek U almag verstaan,  
is dit 'n voorreg om hier staan! (Ps 84:4b-6)

En jy, liewe leser, wat ook op die drumpel staan  
wat jy meer as die Koragiet kan verstaan:  
Met Jesus se sterwe het die voorhangsel geskeur. (Mat 27:51)  
Nou word niemand se toegang meer gekeer. (Heb 10:19)

Die laaste hoëpriester, Jesus, is volmaak  
met ons verlossing Sy aardse taak. (Heb 7:25-28)  
Hy het een maal die heiligdom binnegegaan (Heb 9:13)  
sodat jy nie meer op die drumpel hoef te staan!

Maar jy moet ook die waarskuwing sien  
anders gaan jy Korag se straf verdien...  
Geen onsedelikheid – lewe tot Sy eer:  
Jou liggaam is die tempel van die Heer. (I Kor 6:15-20, Jud 1:4, 10-11)

## **Kyk op in geloof**

Ons is sat vir die slegte kos wat U ons gee...  
Hy stuur toe giftige slange en straf hul daarmee. (Num 21:5-6)

Ons bely ons het sonde teen God gedoen,  
bid tot God om ons met Hom te versoen. (Num 21:7)

Kyk na die koperslang op die paal:  
Redding word deur geloof bepaal. (Num 21:8-9; Joh 3:14-15)

God het vir die wêreld in liefde omgee,  
daarom het Hy Sy enigste Seun gegee,  
sodat die wat glo nie verlore sal gaan,  
maar vir ewig by Hom sal lewe en bestaan. (Joh 3:16)

Ook ek is in sonde verstrik,  
deur Satan in die hakskeen gepik...

O God, ek bely ek is verrot  
en sondig teen elke gebod!

Kyk op na My Seun op die kruis:  
Geloof bring jou na My huis!

## Bileam

Die leiers van Moab het Bileam gaan soek.  
Hy moes die Israeliete vir hulle kom vervloek. (Num 22:6-7)  
God: Staan hulle versoek teen,  
want daardie volk is geseën. (Num 22:12)

Balak stuur hulle weer na waar Bileam woon.  
Jy moet kom – ek sal jou goed beloon!  
Gaan saam soos hulle wil hê,  
maar jy mag net doen wat Ek sê.

Bileam het toe agteraf oorweeg  
om vir geld hierdie onreg te pleeg. (II Pet 2:15-16)  
Die Here het kwaad geword to Bileam gaan.  
Die Engel van die Here het voor hom gaan staan. (Num 22:22).

Toe die donkie voor die Engel gaan staan  
het Bileam hom drie keer hard geslaan.  
Die donkie het toe met Bileam gepraat:  
Hoekom slaan jy my en word jy kwaad? (Num 22:27-28)

Die Here het Bileam se oë oopgemaak,  
toe sien hy die Engel van die Here raak.  
Ek het drie keer voor jou kom staan,  
want jy het op 'n gevaarlike pad gegaan. (Num 22:32-33)

Ek het sewe altare gebou,  
vervloek die volk dan nou!  
Ek sien 'n volk – afgesonder vir Hom,  
met getalle wat elke mond verstom. (Num 23:9-10)

God hou sy beloftes, moet jy besef:  
Geen ramp sal vir Israel tref!  
Deur hierdie woorde moet jy leer:  
soos 'n leeu sal hulle jou verskeur! (Num 23:18-24)

Ek sien God is aan Israel se kant:  
Hulle sal tuine langs riviere plant.  
Die waterkruike loop van oorvloed oor.  
Al die nasies wat teen hom veg verloor. (Num 24:6-9)

Ek sien hom,  
maar hy kom nog nie nou.  
Ek kyk na hom,  
'n Ster sal uit Jakob ontvou. (Num 24:17)



'n Heerser staan uit Israel op  
en verpletter Moab se kop.  
Hy vernietig die wat teen hom opstaan.  
Edom en Seir sal hy ook verslaan. (Num 24:17-18)

Barak, as jy hierdie volk wil verslaan,  
moet jy hulle sterkpunt verstaan  
Hulle God het 'n streng gebod:  
Hulle moet in afsondering leef vir hul God. (Op 2:14).

Die Moabitiese vrouens was mooi  
en het die Israelitiese mans genooi  
om saam offers te bring vir hul gode,  
al was dit deur God streng verbode. (Num 25:1-2)

Hulle het daar onsedelik opgetree  
en dit bring toe God se toorn mee. (Num 25:3)  
Die volk het by die tent van ontmoeting staan en treur.  
Vier en twintig duisend het hul lewens verbeur. (Num 25:9)

En jy leser, as jy dalk wonder:  
Ook jý is vir God afgesonder.  
Jy moet daarom Sy boodskap verkondig:  
Jy is uit duisternis geroep, moenie sondig! (I Pet 2:9)

Jy moenie eers oorweeg  
om Bileam se bedrog te pleeg. (Jud 1:11)  
Die wêreld sal jou haat  
vir elke goeie daad. (Joh 15:19).

Ek sal vir julle die Gees stuur  
sodat julle dit kan verduur.  
Omdat julle aan My behoort  
getuig dan van My Woord. (Joh 15:19; 15:26)

## Op die rand van die belofde land (Deuteronomium).

### God is getrou: Jy moet vertrou

Ek wil dat julle onthou:  
God was altyd getrou,  
dis óns wat moet berou. (Num 1:19)

God het gesê: Trek die land in,  
Ek het beloop dit is julle sin.  
Deur My krag sal julle oorwin. (Num 1:21-25)

Die verspieders het uitgegaan:  
“Ons kan hulle nie verslaan –  
Hulle is soos reuse, moet jy verstaan!” (Num 1:26-28)

Onthou, ek het julle toe gevra:  
Het God ons nie tot hier gedra?  
Ons moet net in vertrou Sy hulp vra! (Num 1:29-33)

God het ons gestraf soos ons verdien:  
“Nie een van hierdie geslag sal die land sien.  
Miskien sal julle in veertig jaar leer, miskien...” (Num 1:34-36)

Julle was moedswillig en ongehoorsaam.  
Werk, van nou af, as God se volk saam  
en eer Sy groot en heilige Naam. (Deut 4:5-7)

Julle probleem was ongeloof –  
Leer nou: Glo wat God beloop.  
Julle moet Hom in vertrou loof.

Julle staan nou hier op die rand  
van die lank belofde land.  
Vetrou hierdie keer God se hand! (Deut 4:30-40)

Jy, liewe leser, moet ook onthou:  
God is en bly nog altyd getrou,  
Jy moet jou ongehoorsaamheid berou.

Jy staan ook nou op die rand  
van die lank belofde land.  
Neem in vertrou God se hand!

Ja, val in eerbetoon voor Hom neer,  
gee buigend die magtige Skepper alle eer.  
Jubel van harte tot eer van die Heer. (Ps 95:1-2)

## **Versoekings in die woestyn**

Moses:

Die Here het jou veertig jaar gelei  
om jou daarmee nederig te kry.  
Hy het dit gebruik as toets vir jou  
om te sien of jy Sy gebooie sou hou. (Deut 8:2).

God:

Die Gees het Jesus na die woestyn gelei.  
om moeg en honger die Satan te kry.  
Ek het dit gebruik as toets vir Hom  
anders kom die hele mensdom om... (Mat 1:1-2)

Moses:

God het jou laat swaarkry  
en jou laat honger ly.  
Hy wou jou daarmee leer  
selfs brood kom van die Heer. (Deut 8:3).

God:

In My Seun se hongersnood  
Sê Satan: "Maak klippe brood..."  
" 'n Mens kan nie net van brood leef,  
maar van die Woord wat God gee!" (Mat 4:3-5)

Moses:

Jou klere het nie eens verslyt.  
Geen geswelde voete in dié tyd.  
So het jou Vader, Heer,  
jou dissipline geleer. (Deut 8:4-5)

God:

"Spring in vertroue af", het Satan gevra.  
"Engele sal jou mos op hul hande dra..."  
"Wat ook in die Woord staan moet ek vertel:  
Jy mag jou God nie so op die proef stel!"

Moses:

As jy hierdie land en rykdom kry  
moet jy hoogmoedigheid vermy.  
Ek, jou God het jou uit slawerny bevry -  
die krag vir die oorwinning kom van My! (Deut 8:10-18)

God:

"As jy my aanbid en buig voor my"  
het Satan gesê, "kan jy al die koninkryke kry."

“Wat jy ook in Sy Woord moet sien:  
Jy mag net God alleen dien!”

Moses:

Wat jy ook uit dié tyd moet sien  
is dat jy glad nie die land verdien.  
Jy het heeltyd hardkoppig geraak  
God gee dit vir jou al is jy nie volmaak. (Deut 9:4-6)

God:

Wat jý ook in jou woestyntyd moet sien,  
is dat jy nie die ewige lewe verdien!  
Wat jý in My Woord moet sien:  
My Seun het dit vir jou verdien! (Heb 2:18)

## Seën en straf

As jy luister na die Here jou God  
en jy is gehoorsaam aan Sy gebod,  
sal daar seën  
oor jou reën... (Deut 28:1-2, 12)

Jy sal kry meer as jou deel  
wanneer jou diere teel. (Deut 28:4)  
Geseënd is wat jy aanpak  
Graanskure sal jy vol kan pak. (Deut 28: 8)

Al kom jou vyande in getal  
hulle sal voor jou val. (Deut 28:7)  
Al die volke sal weet  
dat jy God's volk heet. (Deut 28:10)

As jy nie luister na die Here jou God  
en ongehoorsaam is aan Sy gebod  
dan moet jy besef,  
Sy straf gaan jou tref! (Deut 28:15)

Opbrengs moet jy nie soek –  
daarop rus 'n vloek.  
Rus moet jy nie soek –  
ook daar rus 'n vloek. (Deut 28:16-19)

Peste en plae  
kom in dié dae. (Deut 28:21)  
Stof en roet sal reën  
in plaas van My seën. (Deut 28:24)

As jou vyande kom in getal  
sal jou lyke voor hulle val. (Deut 28:25-26)  
Die Here sal jou tref met kranksinnigheid,  
waansin, tering, koors en blindheid. (Deut 28:22, 28:27-29)

Jy sal 'n huis bou, maar nie daarin woon.  
Jy sal wingerde aanlê sonder loon. (Deut 28:30)  
Ek gee vir jou vyand jou beeste en kleinvee.  
en sal jou kinders vir 'n vreemde volk gee. (Deut 28:31-32)

Let op die goedheid en strengheid van God:  
Hy straf die wat afvallig is teen Sy gebod,  
maar sien Sy goedheid oor jou  
want jy is aan Hom getrou. (Rom 11:22)

Jy moet volhardend bly vertrou  
dat God Sy beloftes sal hou:  
Wie vrygespreek is omdat hy glo  
sal vir ewig lewe saam met Hom daarbo. (Heb 10:35-39)

## Ek wil soos 'n koning leef

In hierdie nuwe jaar wil ek streef  
om net soos 'n koning te leef!  
O God is dit te veel gevra,  
is ek nou net voor op die wa?

My seun, weet jy wat ek van 'n koning vra?  
Kan jy daardie verantwoordelikhede dra?  
Is jy seker dis wat jy begeer?  
Kom laat ek jou hieroor leer:

Jy mag nie baie perde aanhou,  
perde gee mos militêre mag,  
dan gaan jy dink dis jou eie krag  
en jy gaan nie meer op my vertrou. (Deut 17:16)

Jy mag nie van ongelowige vrouens hou  
en ook nie met baie vrouens trou  
anders word jy aan My ontrou. (Deut 17:15, 17)

Silwer en goud moet jy nie vergaar  
en dan begin om jou rykdom te meet,  
want dis dan wat jy van my vergeet  
en jou onafhanklik van My verklaar. (Deut 17:17)

Jy moet die afsrkif van my wetboek lees,  
want so werk ek in jou deur My Gees.  
So sal die koning voorspoed kry  
in gehoorsaamheid aan My. (Deut 17:18-20)

Al die konings op aarde het gefaal  
met die uitsondering van Een  
en dit was My geliefde Seun,  
wat vir hulle moes kom betaal.

O God, ek het nie verstaan  
waaroor dit werklik gaan.  
Dis nie 'n koning wat ek wil wees,  
nee, gee my asseblief U Gees.

Help my om die jaar net op U te vertrou.  
Bewaar my van versoekings en ontrou.  
Laat my besittings tot nut van ander wees  
en laat ek U Woord gereeld bly lees.